

BATAKURU YUUDU NDUN

¹ Immorde e an min Yuudu, nduu kurkaadu Iisaa Almasiihu on, dun ko oo mijjniraawo Yaaquuba, haa e bee noddaabe, be Alla Baabaajo on yidi, maraabe Iisaa Almasiihu on. ² Yo yurmeende e buttu e giggol sowindirane on.

*Fii Jannoobe Penaale ben
(2Pe. 2.1-17)*

³ Yibbe, e nder ko mi marnoo faale tiifudo fii windangol on fii kisiyee mo hawtudsen on, mi taw bee mi winda taho fii wakkilingol on no tippiranon gomfinal hewtinaangal yimbe Alla ben nde wootere haa poomaa. ⁴ Ko fii wobbe be naawoore mun windananoo gila neebii no bisii e hakkunde mon, dun ko be rewataa Alla ben. Hiibe waylude moyyere Alla men on jiibaare, be yeddi Iisaa Almasiihu on, on Hooreejo men e Joomi men bajjo.

⁵ Mido faalaa andintinde on ko andudfon moyya, bay Joomiraado on dandii jamaa *Isra'iila on e nder leydi *Misira ndin, bawto dun o muluno kadi be gomfinaa wonnoobe hakkunde maabbe ben. ⁶ Awa kadi malaa'ikaabe hawkunoobe nokkuure mun nden be ronki jogaade bawgal ngal be halfinaa ngal, o jolkii be jolokooje de be seedataa, o marii be ka nder nibe haa nande palaande mawnde naawoore nden. ⁷ Ko wano non kadi, bee yimbe dee ca'e Saduuma e *Amuura wondude e ca'e de de

kawtiri ñen, wadfirnoo jinaa, hibe dabbaynoo yi-idugol e mbalndi no haaniraa, ñen wadaa misal fii wonoyaybe e ley lette yiite poomayankeeewe ngen.

⁸ Ko wano non kadi, ñen yimbe ko miijotoobe mijiiji mehi, be tuunina bandu ndun, be hoyna laamateeri Joomiraado on e ruuhuji ñin ka kammu. ⁹ E hin-le, fewndo Miikaa'iilu oo malaa'ikaajo mawdo yeddondiri e Ibuliisa, be poodondiri fii furee Muusaa on, kanko Miikaa'iilu o suusaano mo jaawirde hoyre, o wi'uno tun: «Yo Joomiraado on donkine!» ¹⁰ Kono ben yimbe no hoyna ko be andaa, ko be andani hoore mabbe kon kadi no wa'i wa mummunte ñi alaa mijiiji-miccoo, ñun-le ko halkaydfun be.

¹¹ Bone wonanii be, ko fii be jokkii laawol Qaayiina ngola, be ukkori e ella fii hebugol njoddi wano Bal'ama nonb, awa kadi be muliri sabu murtaldo mabbe wano Qooraha nonc. ¹² Ko be baade baleeje ka mottondire mon fii hiraande jokkere endan. Hibe wada mbeleede e baawo hersa, hibe hittini fii hoore mabbe tun. Ko be duule de aldaa e ndiyan, de hendu sorootoo naba. Ko be ledde dabbunde de aldaa e bibbe, maydse laabi didi, boraa. ¹³ Ko wano morloofe ndiyan naadufe bugitortoo ngufo ka sera baharu, tuunina mo non, ko wano non kambe kadi be tuuninirta wobbe goo kuude mabbe hersiniide. Hibe wa'i wa koode yiilottoode, be niwre nibbe maranaa haa poomaa. ¹⁴ Ko fii mabbe kadi,

a **1:11** 1.11a Fud. 4 b **1:11** 1.11b Ada. simooje 22-24 c **1:11** 1.11c Ada. 16

Hanuuka, on njeedidabo gila e *Aadama, hiitinoo*, o wi'i: «Awa, Joomiraado on arii wondude e laabube makko guluuje guluuje, ¹⁵ fii wadugol naawoore e hoore fow, e fii hollugol be rewataa Alla ben fow kuude mabbé bonde ðen, e kala kongudi sattudi di junuubankeebé, be rewataa Alla ben, wowli e hoore makko!» ¹⁶ Ben ko yimbe ñormotoobe, woytotoobe, jokkubé himmeeji mun, be tawata kundule mun no wowla haalaaji manti, mantoobe yimbe fii nafa mun.

Fii Waajagol Gomdinbe ben

¹⁷ Kono onon, yo yibbe, anditee fii waajuuji di bee *sahaabaabe Iisaa Almasiihu Joomi men on hiitinoo, ¹⁸ hibe wi'aynoo on: «Ka saa'iiji sakkitori woodoyay yawitiibe, jokkoyaybe himmeeji mun bondi di yaadaa e faale Alla on.»^d ¹⁹ Awa e hino ben, ko bee waddooße, jokkubé miijooji aduna, be Ruuhu Alla on alaa e mun.

²⁰ Kono onon non yo yibbe, tiidinee ngurndan mon d'an e hoore gomfinal mon hormorteen-gal ngal, tororon Alla bawgal *Ruuhu Seniido on, ²¹ catodon e giggol Alla ngol, habbodon yurmeende Iisaa Almasiihu Joomi men on, fii yedfugol on *ngurndan poomayankejan.

²² Yurmee sikkitiibe ben, ²³ faaboron beya kadi jattingol be yiite, yurminiron beya yurmeende wondude e kulol, e nder ajugol tuundi haa apa tuundi conci tuuniniraadi kuude bandu.

Du'aa fii Rawnagol

²⁴ Awa, on Alla waawudo on dandude kala
yanal, fejnina on yeeso mangu mun ngun e nder
weltaare mon, tawa on felnaaki, ²⁵ ko kanko
Alla bajjo on, on Dandirdo en Iisaa Almasiiihu
Joomi men on, darja e mangu mawngu e doole
e bawgal wonani, ado saa'iiji d'in fow, e jooni, e
haa poomaa. Aamiina!

Version Pular Fuuta-Jallon The New Testament in the Fouta-Jallon Pular language of Guinea

copyright © 2010 Pioneer Bible Translators

Language: Pular

Translation by: Traducteurs Pionniers de la Bible

Contributor: Pioneer Bible Translators

This translation, published by Pioneer Bible Translators, was published in 2011.

If you are interested in obtaining a printed copy, please contact wab.admin@pbt.org.

The translation was completed in collaboration with Christian Reformed World Mission.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

PDF generated using Haiola and XeLaTeX on 11 Nov 2022 from source files dated 29 Jan 2022

024b8126-79ef-5039-bc54-7d61889f8ae6